

PRAVILNIK

O VRSTI I UVJETIMA ZA IZVRŠENJE KRIVIČNE SANKCIJE RADA ZA OPĆE DOBRO NA SLOBODI

I. OPĆE ODREDBE

Član 1.

Ovim Pravilnikom utvrđuju se vrste i uvjeti za izvršenje krivične sankcije rada za opće dobro na slobodi, koja predstavlja posebnu krivično-pravnu mjeru, odnosno mjeru iz kategorije alternativnih krivičnih sankcija, koju u zakonom predviđenom postupku izrekne Sud Bosne i Hercegovine, inozemni sud za djela predviđena u Krivičnom zakonu Bosne i Hercegovine ili je to predviđeno Međunarodnim ugovorom, kao i na zahtjev osuđenog lica ako mu je ta sankcija izrečena u entitetskim sudovima za djela predviđena Krivičnim zakonom Bosne i Hercegovine.

Rad za opće dobro na slobodi (u daljnjem tekstu: rad za opće dobro), izvršava Ministarstvo pravde Bosne i Hercegovine (u daljnjem tekstu: Ministarstvo pravde).

Član 2.

Kad sud odmjeri i izrekne kaznu zatvora od najviše šest mjeseci, istovremeno može odrediti da se izrečena kazna, uz pristanak optuženika, zamijeni radom za opće dobro.

Odluka da se kazna zatvora zamijeni radom za opće dobro zasniva se na ocjeni da, uzimajući u obzir sve okolnosti koje određuju vrstu i raspon kazne, izvršenje kazne zatvora ne bi bilo neophodno za ostvarenje svrhe kažnjavanja, ali istovremeno uvjetna kazna ne bi bila dovoljna za postizanje opće svrhe krivično-pravnih sankcija.

Član 3.

Rad za opće dobro određuje se u trajanju srazmjerno izrečenoj kazni zatvora od najmanje deset do najviše šezdeset radnih dana. Rok izvršenja rada za opće dobro ne može biti kraći od jednog mjeseca niti duži od jedne godine.

Pod radnim danom podrazumijeva se osmosatno radno vrijeme, odnosno sedmično radno vrijeme lica raspoređenog na rad za opće dobro iznosi 40 sati, a raspoređuje se na najmanje pet radnih dana.

Lica koja rade puno radno vrijeme po osnovu navedene krivično-pravne mjere, imaju pravo na odmor u toku radnog dana u trajanju od 30 minuta.

Član 4.

Odmjeravajući trajanje rada za opće dobro kao i rok izvršenja tog rada, sud će uzeti u obzir izrečenu kaznu zatvora koja se zamjenjuje i mogućnosti učinioca u pogledu njegove lične situacije i zaposlenja.

Član 5.

U slučaju kada osuđenik po isteku određenog roka, nije izvršio ili je samo djelimično izvršio rad za opće dobro, sud će donijeti odluku o izvršenju kazne zatvora u trajanju srazmjernom vremenu preostalog rada za opće dobro.

Trajanje rada za opće dobro određuje se srazmjerno izrečenoj kazni zatvora tako da je deset radnih dana jednako jednom mjesecu zatvora, odnosno šezdeset radnih dana jednako šest mjeseci zatvora, pa će se na osnovu toga tražiti odnos između visine izrečene kazne zatvora i trajanja rada za opće dobro posebno u slučajevima kada je osuđenik samo djelimično izvršio rad za opće dobro.

Član 6.

Zamjena kazne zatvora radom za opće dobro može se primijeniti i u slučajevima kada se odlukom suda novčana kazna zamjenjuje kaznom zatvora, shodno članu 47. Krivičnog zakona Bosne i Hercegovine ("Službeni glasnik BiH", br. 3/03, 32/03, 37/03, 54/04, 61/04 i 30/05).

Član 7.

Izvršavanje rada za opće dobro prema osuđeniku započinje nakon pravosnažnosti sudske presude.

Rad za opće dobro traje najmanje 10 a najviše 60 dana, u skladu s presudom iz prethodnog stava.

Rad za opće dobro izvršava se u mjestu prebivališta, odnosno boravišta osuđenika.

Rok za upućivanje osuđenika na izvršavanje rada za opće dobro ne može biti kraći od jednog mjeseca ni duži od jedne godine od dana dostavljanja presude Ministarstvu pravde.

Osuđenik ne snosi troškove izvršavanja rada za opće dobro niti plaća takse na podneske, službene radnje i odluke u vezi s primjenom ovoga pravilnika.

Rad za opće dobro je besplatan i ne služi postizanju dobiti.

Član 8.

Svrha izvršavanja rada za opće dobro je da se, uvažavajući opću svrhu krivično-pravnih sankcija, osuđenik kojem je, pod određenim uvjetima i obavezama, ograničena sloboda, ne isključi iz društva, već da, uz pomoć i nadzor društvene zajednice, dobrovoljno ličnim postupcima, radom i odnosom prema posljedicama izazvanim počinjenim djelom razvije svijest o štetnosti određenih ponašanja i odgovornosti za štetne posljedice.

Član 9.

Državni organi, ustanove i druga pravna lica dužni su saradivati s Ministarstvom pravde, u izvršavanju rada za opće dobro, kad to Ministarstvo pravde od njih zatraži.

Član 10.

Rad za opće dobro, može se obavljati u državnim organima, ustanovama i drugim pravnim licima (u daljnjem tekstu: poslodavac), koje obavljaju djelatnost u okviru koje se može ostvariti opća svrha kažnjavanja izvršavanja krivično-popravnih sankcija i posebna svrha izvršenja rada za opće dobro.

Djelatnost poslodavca treba biti humanitarna, ekološka, komunalna, uslužna, kao i svaka druga djelatnost za koju Ministarstvo pravde smatra da se sa istom može postići opća svrha izvršavanja, kao i posebna svrha izvršavanja navedene krivične sankcije.

Član 11.

Poslovi na kojima se obavlja rad za opće dobro u državnim organima mogu biti:

1. Administrativno-tehnički,
2. Operativno-tehnički i
3. Pomoćni poslovi.

Član 12.

Poslovi na kojima se obavlja djelatnost u ustanovama mogu biti pomoćni i administrativno-tehnički poslovi u javnim ustanovama čiji je osnivač Vijeće ministara BiH, Federacija BiH, Republika Srpska, Brčko Distrikt BiH, kantoni Federacije BiH ili u ustanovama u kojima su navedeni organi povjerali javna ovlaštenja, općine, kao i u drugim ustanovama u oblasti fizičke kulture, kulture, obrazovanja, nauke, zdravstva, dječje zaštite, socijalne zaštite i socijalne sigurnosti.

Član 13.

Poslovi na kojima se obavlja djelatnost u drugim pravnim licima mogu biti poslovi nekvalifikovanog do visokokvalifikovanog radnika, odnosno pomoćni i administrativno-tehnički poslovi u javnim preduzećima čiji su osnivači organi iz člana 12. ovog Pravilnika, preduzećima, firmama, kao i drugim pravnim licima ili udruženjima.

Član 14.

Poslovi kod poslodavca kod kojeg je osuđenik do tada bio u radnom odnosu mogu biti isti poslovi na kojima je osuđenik do tada radio ili drugi poslovi.

Član 15.

Ministarstvo pravde raspoređuje osuđenike na rad za opće dobro, određuje vrstu posla i radno mjesto na kojem će se obavljati rad za opće dobro, vodeći računa o sposobnostima i znanjima osuđenog lica.

Ministarstvo pravde neposredno preduzima mjere za poboljšanje izvršavanja rada za opće dobro, pruža stručnu pomoć, prikuplja i obrađuje statističke podatke, te obavlja i druge poslove propisane ovim Pravilnikom i drugim propisima.

Ministarstvo pravde saraduje s drugim državnim organima, naučnim i drugim ustanovama, strukovnim udruženjima, drugim pravnim licima i pojedincima, radi poboljšavanja uvjeta izvršavanja rada za opće dobro i pomoći osuđenima.

Ministarstvo pravde, kad je to u javnom interesu ili kad to nađe za potrebno, radi upoznavanja javnosti, obavještava javnost o uvjetima i stanju izvršavanja rada za opće dobro, radi uključivanja društvene zajednice u postupke izvršavanja.

II. NAČELA IZVRŠAVANJA RADA ZA OPĆE DOBRO

Član 16.

Rad za opće dobro izvršava se na način koji osuđeniku i njegovoj porodici jamči poštivanje ljudskog dostojanstva, osnovnih prava i sloboda i privatnosti.

Zabranjuje se diskriminacija zasnovana na rasi, boji kože, spolu, jeziku, religiji ili vjerovanju, političkom ili drugim uvjerenjima, nacionalnom i socijalnom porijeklu.

Osuđenik, koji je bio podvrgnut nezakonitom postupanju ili diskriminaciji iz stava 2. ovoga člana, ima pravo na naknadu štete.

Član 17.

Rad za opće dobro izvršava se prema pojedinačnom programu izvršavanja, u skladu sa ovim Pravilnikom.

Pojedinačni program iz stava 1. ovog člana utvrđuje državni službenik i povjerenik za svakog osuđenika, a na osnovu osobina ličnosti, ličnih prilika, zdravstvenog stanja, zaposlenja, sposobnosti i stručnosti osuđenika.

III. ORGANI, LICA I NAČIN IZVRŠAVANJA RADA ZA OPĆE DOBRO

Član 18.

Ministarstvo pravde izvršava pravosnažnu presudu o zamjeni kazne zatvora radom za opće dobro, putem državnog službenika Ministarstva pravde i povjerenika.

Povjerenik je zaposlenik pravnog lica kod kojeg se obavlja rad za opće dobro (u daljnjem tekstu: povjerenik), kojeg na prijedlog rukovodioca tog pravnog lica, rješenjem imenuje ministar pravde i koji obavlja neposredni nadzor nad izvršavanjem rada za opće dobro.

Državni službenik iz stava 1. ovog člana i povjerenik može biti lice koje ima završenu visoku stručnu spremu, radno iskustvo u trajanju od najmanje tri godine i primjerene ljudske osobine koje mogu biti uzor ponašanja osuđenika.

Izuzetno, povjerenik ne mora imati visoku stručnu spremu, ukoliko u tom pravnom licu nema odgovarajućih zaposlenika visoke stručne spreme.

Ministarstvo pravde vodi evidenciju povjerenika.

Za svoj rad državni službenik i povjerenik su odgovorni ministru pravde.

Član 19.

Ministarstvo pravde organizuje obuku, radi osposobljavanja povjerenika i upoznavanja sa njihovim pravima i obavezama.

U organizovanju obuke povjerenika, Ministarstvo pravde može zatražiti pomoć od ministarstava nadležnih za zdravstvo, rad i socijalnu zaštitu, obrazovanje i sport, a po potrebi i drugih državnih organa, ustanova, udruženja i pojedinih stručnjaka (socijalni zaposlenik, pedagog, psiholog i sl.).

Ministar pravde donosi Pravilnik o načinu rada, odgovornosti, obučavanju i evidenciji povjerenika.

IV. IZVRŠAVANJE RADA ZA OPĆE DOBRO

Član 20.

Djelatnost u okviru koje se obavlja rad za opće dobro mora odgovarati općoj svrsi krivično-pravnih sankcija i posebnom cilju ovoga rada.

Rad za opće dobro može se izvršavati kod poslodavca kod kojeg je osuđenik do tada bio u radnom odnosu, ukoliko je s tim saglasan poslodavac i osuđenik.

Ministar pravde zaključuje ugovore s državnim organima, ustanovama, poslodavcima iz prethodnog stava i drugim pravnim licima o postojanju zajedničkog interesa za izvršavanje rada za opće dobro i upućivanju osuđenika na rad za opće dobro.

Ugovor iz prethodnog stava ovoga člana sadrži opis djelatnosti poslodavca, vrste poslova na kojima osuđenik može izvršavati rad za opće dobro, mjesto izvršavanja rada za opće dobro, spisak lica koja mogu biti imenovana za povjerenike, vrijeme trajanja ugovora, uvjete pod kojima se može raskinuti ugovor, prava i obaveze Ministarstva pravde i poslodavca i druga pitanja od značaja za izvršavanje rada za opće dobro.

Ministarstvo pravde vodi evidenciju poslodavaca s kojima su zaključeni ugovori iz stava 3. ovog člana i popis radnih mjesta.